

- मुख्यमंत्री भजनलाल शर्मा कह्यो—जयपुरवासियां रे खातिर सुगम अर अत्याधुनिक परिवहन तंत्र कर्यो जावेला विकसित।
- प्रदेशभर भर मांय भगवान महावीर री जयंती आज श्रिद्वा अर उच्चास रे साथै मनाई जा री है।
- राज्य मांय गर्मी ने देखता थकां आपदा प्रबंधन मंत्री डॉ. किरोडी लाल मीणा विभागीय अहलकारां ने दिया दिशा निर्देश।
- करौली, बाडमेर, जालोर साथै केई ज़िलां मांय धूलभरी आंधी अर बूंदाबांदी होणे सूं तेज गर्मी सूं मिली राहत।

000

मुख्यमंत्री भजनलाल शर्मा कह्यो है के राज्य सरकार री मंशा है कि जयपुरवासियां खातिर सुगम अर अत्याधुनिक परिवहन तंत्र विकसित कर्यो जावे जिण सूं जयपुर स्मार्ट सिटी री दिशा मांय देशभर मांय मॉडल शहर बणा सके। श्री शर्मा आज मुख्यमंत्री निवास माथे जयपुर मेट्रो फेज द्वितीय खातिर तियार करी जा री विस्तृत परियोजना रिपट ने ले र राख्यी ज्यी बैठक ने सम्बोधित कर रह्या हा। वणा कह्यो के डीपीआर मांय प्रस्तावित सीतापुरा सूं अंबाबाड़ी अर विद्याधर नगर तांई भविष्य री आवश्यकता अर आमजन री सुगमता ने देखता व्हया मेट्रो टेशन बणाया जावे। श्री शर्मा कह्यो के जयपुर एक ऐतिहासिक अर तेजी सूं बढ़तो शहर है अर मेट्रो रा विस्तार अठे री बधती आबादी अर यातायात दबाव ने संतुलित करणे मांय खासी भूमिका निभावेला। वणा प्रोजेक्ट मांय खर्चा अर लागत रो समुचित आकलन करणे माथे भी जोर दियो, जिण सूं वित्तीय संसाधनां रो सदुपयोग होणे रे साथै आम जन खातिर बेहतर परिवहन सुविधा मुहैया करवायी जा सके। वणा कह्या के मेट्रो टेशन एडी जगावां माथे बणाया जावे जका आम लोगां रे पहुंच मांय हो अर रेलवे टेशन अर एयरपोर्ट रे कने हो, जिण सूं मेट्रो री उपयोगिता बढ़ सके।

000

लोकसभा अध्यक्ष ओम बिरला हिंदी अर संस्कृत समेत दूजी भारतीय भाषावां मांय उज्बेकिस्तान रे विद्वानां री गहरी रुचि री सराहवणा करी है। श्री बिरला कह्यो के उज्बेकिस्तान विद्वानां अर विद्यार्थियां ने आप रे शिक्षण अर शोध कामां रे जरिये भारत अर उज्बेकिस्तान रे ऐतिहासिक संबंधां ने और बेसी मजबूत कर्यो है। 21वीं सदी ने गढ़ने मांय भारत री खासी महत्ती भूमिकां रो उल्लेख करता थकां श्री बिरला इण बात माथे प्रकाश डाल्यो के उज्बेकिस्तान जेणा मित्र देशां रे साथै सामूहिक विकास अर सहयोग री अपार संभावनावां है। ध्यानजोग है के 150वीं अंतर—संसदीय संघ सभा मांय भाग लेवण खातिर श्री बिरला आं दिनां उज्बेकिस्तान यात्रा माथे है।

लोकसभा अध्यक्ष उज्बेकिस्तान गणराज्य री ओली मजलिस रे लेजिसलेटिव चैम्बर रा स्पीकर नूरदिनजन इस्माइलोव रे साथै द्विपक्षीय वार्ता करी।

0000

जैन धर्म रा 24 वां तीर्थकर भगवान महावीर री जयंती आज श्रिद्वा अर उच्चास रे साथै मनायी जा री है। इण मौके माथे जैन मिन्दरां मांय खास आयोजन राख्या ग्या है। प्रभात फेरियां निकाळ र भगवान रो अभिषेक कर्यो जा रह्यो है। करौली ज़िले रा श्रीमहावीर जी मांय मेलो परवान माथे है। वार्षिक मेला मांय देशभर सूं श्रिद्वालु पंहुच्या है। इण मौके माथे जैसलमेर मांय भव्य शोभा जात्रा निकाळीजी। वठिने, जोधपुर मांय निकाळीजी शोभाजात्रा मांय ईको फ्रेंडली झांकियां आकर्षण रो केन्द्र री। दौसा रा आदिनाथ जैन मिन्दर सूं निकाळी शोभायात्रा रो जगह—जगह फूलां री बिरखा कर स्वागत कर्यो गयो। करौली जिले रा प्रसिद्ध श्रीमहावीर जी मांय जनकल्याण महोत्सव माथे न्यारा—न्यारा कार्यक्रम राख्या जा रह्या है और ब्योरो म्हाणा खबरनवीस सूं—

.....
चित्तौडगढ मांय भी महावीर जयंती माथे शोभायात्रा निकाळी ज्यी इण मौके सासंद सी पी जोशी अर केई जनप्रतिनिधि मौजूद रह्या।
.....

झुंझुनूं मांय भी महावीर जयंती रे मौका माथे जैन मन्दिरां मांय खास आयोजन व्हया अर प्रभात फेरी निकाळीजी। पाली मांय सुवारे भगवान महावीर रे अभिषेक रे पाछे शहर रा खास गेला सूं शोभाजात्रा निकाळीजी। अजमेर मांय केसरगंज सूं निकली शोभाजात्रा मांय स्वर्ण रथ साथै 13 रथ अर चालीस झांकियां आकर्षण रो केन्द्र री। पैली बार 41 साधु साधवियां रो संघ आचार्य वसुनंदी महाराज रा सानिध्य मांय शोभाजात्रा मांय भेळो व्हयो। झालावाड, सलूंबर, बाड़मेर अर बारां मांय भी शोभाजात्रा निकाळी ज्यी।

000

केंद्र सरकार प्रधानमंत्री पोषण शक्ति निर्माण—पीएम पोषण योजना रे तैत सामग्री लागत मांय नौ दशमलव पांच—शून्य फीसदी री बढोतरी करी है। ओ योजना केंद्र प्रायोजित है। ध्यानजोग है के इण योजना मांय सरकारी अर सहायता प्राप्त स्कूलां मांय बालवाटिका अर पैली सूं आठवीं ताँई पढण वाढ़ां ग्यारह करोड सूं बत्ती पढेसरां ने गर्म पकयेड़ो भोजन परोस्यो जावे है। केंद्रीय शिक्षा मंत्रालय कह्यो है के नुवी दरा पैली मई सूं सगळा राज्या अर केन्द्र शासित प्रदेशां मांय लागू व्हे ग्यी।

000

प्रदेश मांय गर्मी बधने रे साथे लू तापघात अर मौसमी बीमारियां सूं बचाव ने ले र सरकार तियारियां तेज कर दी है। आपदा प्रबंधन मंत्री डॉ. किरोड़ी लाल मीणा विभागीय अहलकारां री समीक्षा बैठक ले र जरुरी दिशा—निर्देश दिया है। वठिने राज्य मांय बढती गर्मी, संभावित हीट वेव अर दृजी मौसमी आपदावां सूं निपटणे खातिर करी जा री तैयारियां रो जायजो लियो। इण रे चालता डॉ. मीणा वीसी रे जरिये न्यारा—न्यारा जिलां रा जिला कलेक्टरां सूं करी जा री तैयारियां री जाणकारी ली अर जरुरी संसाधनां रे साथे सावचेत रहणे रो कह्यो। वठिने जिला मांय तापघात मरीजां रे उपचार री व्यवस्थावां ने जांचणे खातिर चिकित्सा महकमों आज मॉकड़िल करी।

000

तेज गर्मी रे मौसम ने देखता थकां प्रदेश मांय महात्मा गांधी नरेगा मजूरां रो बगत जिला कलेक्टर अर जिला कार्यक्रम समन्वयक अधिकारी तैय कर सकेला। ग्रामीण विकास महकमां री अतिरिक्त मुख्य सचिव श्रेया गुहा बतायो कि नरेगा मांय मजूरां खातिर आठ घंटा रो काम रो बगत तैय है। इण मांय एक घंटे रो आराम भी भेळो है। वणा बतायो के संबंधित अहलकार स्थानीय परिस्थितियां ने देखता थकां आप रे स्तर माथे काम रे बगत तैय कर सकेला।

0000

प्रदेशभर मांय तेज गर्मी रे असर रे बीचे आज बाड़मेर अर जालोर साथै कुछ जिलां मांय धूलभरी आंधी चलणे अर बूंदाबांदी होणे सूं तेज गर्मी सूं थोड़ीघणी राहत मिली है। वठिने आज जयपुर समेत केई ज़िलां मांय फेरु गर्मी रा तेवर तीखा रह्यां। इण बीचे मौसम महकमो आवता दो—तीन दिनां मांय मेघगर्जन, आंधी—बारिश री आस जतायी है। महकमों बीकानेर, जयपुर अर भरतपुर संभाग मांय दोपहरां पाछे आंधी अर हल्की बिरखा री आस जतायी है। मौसम केन्द्र जयपुर रा निदेशक राधेश्याम शर्मा बतायो के पश्चिमी विक्षोभ रे असर सूं केई जगहवां माथे आज तेज आंधी चालणे अर बिरखा होणे री आस है। इण सिस्टम रो असर सब सूं बत्ती काले देखण रे मिल सके है। महकमां रे मुजब 13 अप्रैल सूं घणखर ठौड़ा मांय मौसम सूखो रहणे रो पूर्वानुमान है अर तापमार मांय 2 सूं 3 डिग्री बढोतरी होवण री आस है।

000

झालावाड जिले रा खंडिया मांय आज राज्य रा पैला पिंक शहरी स्वास्थ्य केन्द्र री सरुआत व्ही। केन्द्र रो उद्घाटन पैली आळी मुख्यमंत्री वसुंधरा राजे अर झालावाड—बारां सांसद दुष्यंत सिंह कर्यो। और ब्योरो म्हारा खबरनवीस सूं—

000

कोटपूतली बहरोड जिला रे पावटा मांय समर्थन मूल्य माथे सरसो अर चना खरीद केन्द्र री शुरुआत व्ही। केन्द्र रो उद्घाटन पूर्व सांसद रामचरण बोहरा अर विधायक कुलदीप धनखड़ कर्यो। खरीद केन्द्र प्रभारी रोहित यादव बतायो के पावटा कय विक्य सहकारी समिति लिमिटेड. री कानी सूं समर्थन मूल्य माथे खरीद केन्द्र थापित कर्यो ग्यो है, वठिने किसान सरसों और चणा री फसल रे समर्थन मूल्य माथे बिकी कर सके है। इण रे खातिर काश्तकारां ने आप रो जनाधार कार्ड, गिरदावरी अर बैंक पासबुक समेत जरुरी दस्तावेज ले र आणो व्हेला।

000

झुंझुनूं जिले रा घरडाना खुर्द मांय थापित पीएमश्री महात्मा गांधी विद्यालय रो नामकरण अबै शहीद स्कवाइन लीडर कुलदीप सिंह सूं कर्यो ग्यो है। नामकरण अर स्कूल प्रवेश द्वार रो लोकार्पण ज़ल्सो आज राख्यो ग्यो। ज़ल्सा रा मुख्यअतिथि युवा अर खेल मामलात मंत्री कर्नल राज्यवर्धन सिंह राठौड़ हा। कार्यक्रम री अध्यक्षता पूर्व सांसद संतोष अहलावत करी। इण मौके माथे विधायक राजेंद्र भांबू समेत केई जनप्रतिनिधि मौजूद रिया। ज़ल्सा मांय शहीद पिरवार रो सम्मान कर्यो ग्यो। इण मौके माथे खेल मंत्री स्कूल रा खेल मैदान ने स्टेडियम रे रूप मांय विकसित करणे खातिर एक करोड़ रिप्यां मंजूर करण री घोषणा करी। वणा शहीद कुलदीप सिंह रे परिवार रा राष्ट्र सेवा मांय योगदान री सरावणा करी।

000